

2 Oritxi Mahãdu-ò

2 Oritxi Hãwã Dohodỹyna Mahãdu-ò

1 ¹Jiarỹ, Paulo, Deuxu deòduõ watzireri Deuxudeewireki. Tahe katyyriti rewahinyrenyre Oritxi hãwã dohodỹyna mahãdu-ò. Iny seriõrereny Tximòtxi wawana ihỹre. Tule rewahinyrenyre ibutu ityhydỹydu mahãdu roholakemy Akaia bedeki. ²Ruxetõena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrỹ-ribi.

³⁻⁴Deuxu heka Jesuisi Kristu tyby rare. Iny wiõhedỹydu ihỹre.

Ruxetõena sõwemy inydeereny riwahinymyhỹre. Ibutumy aõmydỹyna-di riwiõhenanymyhỹre. Tai tahe iny witxira rikiwiõhenanyrenykre Deuxu wiõhedỹyna-di. ⁵Iwese Kristu aõhõkỹmy dỹynana kaiboho teerytenyete wese, Kristu wiõhedỹyna bitamy bierybenyke. ⁶Jiarỹboho aõhõkỹmy arotỹnyrenykreu, awiõhenadỹnyrenykreu tuukre. Tai tahe tarasana iribi bitake. Deuxu-ribi wiõhedỹyna arimynykeki, kia biu-ò hena iribi bimye arawiõhenanyrenykreu. Tai tahe kaiboho arururenydikre aõhõkỹmy botỹnybenykreu. ⁷Tahe wararòsõna sõwemy ihỹre akireny. Tiubo aõhõkỹmy dỹynanamy botỹnybenykreu tule wiõhedỹyna bitabenyke iwese aritarenykre wese. ⁸Waityhydỹydu seriõre, Asia bedeki jiarỹboho sõwemy aõhõkỹmy ratỹnyny roiremahã. Wadeereny heka isiratyhyre ibede-ki. Tai heka raberumy roiremahã arururenyke lau. ⁹Rahõtynyrenyre tai wakonanareny sana. Kiamy heka wadeereny ditỹnynde bedeernamy: ixi-di inyõ nohõtĩomy, Deuxudihyyle wahe. Tii dori rubu-ribi ixixadu rare. ¹⁰Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre. ¹¹Kaiboho dori wadeereny Deuxu-ò texitõenytenyteri. Tahe ibutumy ixitõena-ò Deuxu kodoholakre tai riwiõhenanykre. Tahe ibutumyiny Deuxu ritealãnananykre.

¹²Ibutumy jiarỹboho heka kia Deuxudeewimy rewinyymyhỹrenyre. Tai heka wadeysarenyre jiarỹboho. Awanareny heka tule rarybemahãrenyre: õbitinamy, Deuxu rurunamy. Iny raykywydyna-di aõkõ wahe, Deuxu raykywydyna-di. ¹³⁻¹⁴Idi mariakele, biritinykele, bierykele, kia reritinyrenyre adeereny. Wiji

urihimyòle teerymy toite. Jesuisi txu tahe ibutumy bierybenyke. Jiarýboho areysarenkyre bierybenykeki wahe. Tule kaiboho beysabenykre.

¹⁵⁻¹⁶Juhuu rahõtinyre kiawesemy: arakemy ixí-di rahõtinyre. Juhuu heka Macedonia hãwã bede-ò arakemy ixí-di rahõtinyre. Iule tahe aroramy arakemy heka ixí-di watxiwãhã. Òkeseu tasý tule, aroramy adehemynykre. Tai wiðhena inatximy bitake. Jiarý ayrenymy areakreu, Judeia bede-ò arakemy kaiboho biwawiðhenanybenykemy. ¹⁷⁻¹⁸Reòsamy watxirerimy aõbohe wadi tahõtinytenyteri? Ixiðrarukile aõbohe tuuremy adee araýraxikre? Tuu aõbo iximý rarybere kohe, myý, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe riere. Kohe, myy, iule. ¹⁹Tai heka raryberenyre: —Inatyhy rare. Myý wahe, Deuxudeewinamy. Sila Tximõtxi-wana kia Deuxu rybe-di adeereny ritýnynyre, Jesuisi Kristu iriðremy, jiarý tule adeereny kia retýnynyre. ²⁰Inyboho ratximyhýre Jesuisi Kristu-ò. Kristu heka Deuxu widýýdu ratxireri. Inyummyreny ratximyhýre. Deuxu heka tuu iny rierynanyhýreny, tii inatyhy. ²¹⁻²²Tii heka iny ritamyhýreny; rihitximyhýreny; tahõrõ mahãdumy riwinyre. Inydeereny riwahinyre Deuxu Tytybytyhy inyworeny-ò risýnyre. Tai heka inyboho rõhõtinyreny inydeereny ibutumy riwahinykremy.

²³Deuxu heka warayky rieryre. Tai heka rarybemahãre, inatyhy raõre Oritxi hãwã-ò. Tai heka adiride ixinamy. ²⁴Araryberenyõtyhy jiarýboho aõbo bityhynybenykemy, marybemy. Kaiboho dorihe inatyhyna tetyhynyteny. Urile tahe arawiðhenanyrenkyre deysana-di Deuxu Tytybytyhy dee deysana-di.

2 ¹Tai wawo rerahõrera. Arakemy aõkõ abedeõtidiýrenymy ixityre. ²Arabedeõtidiýrenykeki tahe mobo riwateysanykre. Kaibohole toite. ³Tai adeereny reritinyre. Anaõtyhy heka abedeõtidiýrenymy. Kaiboho dori deysana-di biwasýnybenyke. Iu wadeysamy watxireriu, kaiboho tule beysabenykre. Kia heka reerywiwire jiarý. ⁴Adeereny reritinyre bedewona-di ranywãhãu; warube rytynmahã. Bedeõtidiýna-di arasýnyrenykemy aõkõ kýny. Tahe timybo aluurenyremy kaiboho bierybenykemy adeereny reritinyre.

⁵Bedewonamy relykeki, tiu inyõ wii ribedewonyreu, riwabadewonyõtyhy. Aõtxi arabedewonyreny. Waryberiti isirare aõkõ ihýre. ⁶Aõhõkýmý dýýnanamy yla aõkõ rotýýnyre. Tai ixinamy rarekre wiji. ⁷Wiji tahe iwitxira aõmydýýnana biwinyke: biwiðhenanyke iixãwididýýnadikemy. Tai tahe bedewona-di sõwetyhymy riatyõtyhy bedewona-ribi wahe. ⁸Tii luunatyhy-di bierynanybenyke.

⁹Tai heka adeereny õnosõna rewahinyre. Tai juhuu waritidýýna adeereny rewahinyre. Jiarý heka kaiboho rexiywinymy aõbo atxitenyteri ityhydýýna-ò. Kiamy adireny watxireri. ¹⁰Kai biixãwididýýnykeki heka, jiarý tule ariixãwididýýnyke. Kia adeereny rikiwinyrenyke Kristu òraru-ki. ¹¹Tahe Satanasi tiu iny riatyrenyõtyhy. Inyboho rieryreny tii kia riwinykemy riwisýnymyhýré.

¹²Jiarý heka rõirenyre Troaji-ò Rybewihiký týnydýýmy Kristuni-di. Tamy rethemynyreu, isiraõlemy tai Rybewihiký dohodýýmy, Inynyryý

riwawiòhenanyre wahe. ¹³ Tahe wabedewomy watxiwãhã inyseriòrereny Txitu-ki rahaòrekí. Tai tahe kia iny mahãdu reteòwarinyre arakremy Macedonia hãwã-ò rare.

¹⁴ Tahe Deuxu deysana! Deuxu-wana watxiwãhãreny. Tahe kia ijesu tai ritake. Kristu heka ridykre ijesu tarasadu mahãdu. Rokoiorenkyre heka ihe-ki. ¹⁵ Iwese aderòna lÿnyrehékÿ ibutumy idi riàlànymyhÿre wese heka, kia wese inyboho roire. Ibutumy iny rierykemy heka ityhydÿÿdu mahãdu rÿirerimy ihÿre. Lÿnyrena wihikÿ Kristu ritoonyre wese Deuxu-ò inyboho roire. Iny lÿnyrena wese heka rare. Ityhydÿÿdu, ityhydÿÿdukòdu mahãdu-ò ramyhÿre. ¹⁶ Kia rityhynÿmyhÿre mahãdu tahe, tÿnyre rirubunyre. Rityhynÿmyhÿre mahãdu tahe tÿnyre iruweselemy rare. Kia aòmÿsÿdÿÿna biwinybenyke. Isirare heka iaòmÿsÿdÿÿ. ¹⁷ Inyboho heka sòwemy inywese aòkò iny roire. Iwese iny riwmyhÿre aòdÿwiriòre idi ijohomy, kia wese karybe rare. Kia Deuxu deòdu mahãdu heka iòwydimy aòkò rybe riwmyhÿre. Tahe inyboho heka inatyhmy rarybemyhÿrenyre. Deuxu dori inydeereny rarybere òbitinamy. Riwateònyrenyre òbitina-di araryberenykemy.

3 ¹ Timyre heka tyyriti ritididÿÿnamy raruòhymahãrenyre jiarÿboho awirenyremy. Tahe waribireny tule aribireny kia Ritidÿÿna arihurenÿotyhy. ² Kaiboho heka Kristu tyyriti wese aòma toite. Riritinymy heka roimyhÿre inywo-ki, inrayky-ki. Idi riramy kaiboho burubenykeki, aòbo kaiboho tewinymahãte heka tamy betehebennyke. Tai tahe rierymy idi rariake ixideele. Idi rariake hãre tahe idi rexibedeerynyke. ³ Kaiboho heka Kristu tyyriti wese heka toite. Inydeereny iwahidÿÿmy heka tii rare. Kia tyyriti witxiramy rare. Aò ritidÿÿna manamy aòkò riwinyreri. Deuxu Tyytybytyhy-di tahe riwinyreri. Aò manatyre-ki aòkò ròritidÿÿreri inraykyreny-ki, inyworeny-ki ròritidÿÿmyhÿre. ⁴ Deuxu heka retyhynymahãre, Kristu òraru-ki wahe. Tai tahe tuu raryberenymahãre kiawesemy. ⁵ Jiarÿboho heka warururenÿohÿyre kaa aòmÿsÿdÿÿna widÿÿna-ò. Iny ruruna heka Deuxu-ribi sohojile nade. Tii iny wiòhedÿÿdu, aò iny rikiwinymyhÿrenyke-ò wahe. ⁶⁻⁸ Irybe tÿmyra dohodÿÿdumy heka inyboho roire. Ihetxiu bede ywina wesemy aòko heka ròritidÿÿre Deuxu Tyytybytyhy ihÿre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidÿÿre. Deuxu loosòna tule ròhònyre, riwahinyreu wahe. Moisesi òsÿny-ribi sòwemy loosòna ròhònyre. Idi tahe riixãwididÿÿnyre. Tahe judeu mahãdu reteheòhymyhÿre iòsÿny-ò, iòsÿny loosònadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosòna wiwihikÿ-di bede ywina tÿmyra tahe iratyre awi rare. ⁹ Tii heka iny-di ixãwikemy ratxireri. ¹⁰ Tahe iratyre rybe tÿmyra rare. Iny òraruna-di ixãwikemy ratxireri. ¹¹ Kia urihimÿò rÿire awi rare. Iratyre tahe umyuedeòna rare.

¹² Iny raròsòna sòwemy ratximyhÿrenyre. Tai tahe inyboho ruberuòhymyhÿrenyre. ¹³ Moisesi wesemy aòkò rakatximyhÿrenyke. Imahãdu rayktxymy dori rÿirenyre. ¹⁴⁻¹⁵ Imahãdutxymy dori rÿirenyre.

Moisesi bedeywina-di rariakeki, irayky ritòbònyke. Kia rieryõrenyre iraykyreny ratxynymyhÿrenyremy. ¹⁶Kristu rityhynyre xiery, irayky raraymyhÿre. Iwese Moisesi òsÿnyntòbòna iòsÿny-ribi resere wese kia rare. ¹⁷Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike. ¹⁸Tahe ibutumy inyboho heka Deuxu wowydyna iny òsÿnyÿreny-ki ijòdire. Iwese iny òsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny òsÿnyreny-ki. Inynyrÿ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrÿ wesemy relemyhÿrenyre. Inihikÿmy delemyhÿdenyde. Tii dori iny woren-y-ki raaòòtaòtamyhÿre.

4 ¹Deuxu taruxetòdena-di heka kia aòmÿsydÿÿna inydeereny diwahinyde. Tai heka ikonanakòdumy idi rakatximyhÿrenyke. ²⁻³Ibutumy heka rikiwinymyhÿrenyke aòbo òbiti rare. Aòbina binahakÿ widÿÿ-ò heka rekexijerenyke aòbo òbitirele heka rikiwinyrenyke; rikiwiurònyrenyòtyhy heka Deuxu rarybereriki, tuu. Deuxuruòhyyle rikiwinyrenyke. Inatyhyna loosòna-ki heka rakatxirenke. Ibutumy heka rikiwinyrenyke ibutu itxerena òbitimy wahe. Inyboho ritÿnynymyhÿre Rybe tymyra wihikÿ. Inyò-ribi riwòmÿ roimyhÿkeki tahe kia rityhynyòmÿyhÿrele tuu ritidimÿ roike. ⁴Kiakeki tahe Satanasi iitxeredÿÿ-ò riijònyreri loosònamy robike lau. Deuxu binadÿÿna rare. Ibinadÿÿdu wesemy ratxireri. Kaa loosòna-ò iny riitxeredÿÿnyhyymyhÿre aòma Rybewihikÿ tÿmyra-ò. Rarybemyhÿre dori Kristu heka Deuxu yrubule rare. ⁵Iximy aòkò rarybemahärenyre. Inynyrÿ Jesuisi Kristulemy heka rarybemahärenyre. Inyboho heka deòdumy inyboho ratximyhÿrenyre adeereny. Jesuisi òraru-ki kia rewinyamahärenyre. ⁶Juhuu Deuxu rarybere: —Bedeluru-ribi heka loosòna doosòmÿhÿde. Tii heka loosòna-di inraykyreny ritoosònanymyhÿre. Tai heka iny Deuxu erysydÿÿna inyboho rieryrenyre. Kristu òsÿny-ki sohojile tuu rokobirenke.

⁷Kia heka aòna aòna wiwi inydeereny heka rare. Ihyna òwy riòre wesemy inyumyreny ratxireri, butxi weselemy wahe. Tai heka Deuxu sohojile irurudire, inyboho aòko irurudire. ⁸Ihàrele heka aòbo iny riwinyke rieryòhyymyhÿre timybo aò iny riwinyke heka. ⁹Aòhòkÿmy dÿÿnana heka inydeereny rehemynymyhÿre tai inyboho ikyhynamy riemyhÿrenyre. Inyboho heka bedewodihyy ratximyhÿrenyre, tahe tiemy iny raròsònarendihyy inyboho ratximyhÿrenyre. ¹⁰Inyboho heka itxi tòhòti reahyy inyboho ratximyhÿrenyre, Jesuisi rubuna-txi wahe. Kaki tahe iwese Jesuisi raremyhÿ wese heka rakatxirenke. Tai iny witxira heka tuu robikre kiamy, Jesuisi rirudÿÿnanamy. ¹¹Jesuisi òraru-ki heka brebunahakÿ-ki inyboho roire. Kia wese-ki heka iny Jesuisi runamy robikre inykireny. ¹²Kia-ki heka iny rubukonanareny inykireny rare. Tahe iruna akireny tule ratximyhÿre. ¹³Kiamy heka Ritidÿÿna roire: —Jiarÿ retyhynyre. Taita rarybere: —Kia weselemy roire. Retyhynyrenyreri tai heka jiarÿboho tule raryberenyre. ¹⁴Jesuisi ixixadÿÿdu heka rare. Kaa tule inyboho tule riixixanyrenkre. Rikirònykre heka Deuxuko-txi. Kaiboho tule boibenyke wawanareny. ¹⁵Jiarÿ wawanareny kia adeereny relere. Tamy Deuxu ruxetòdena sòwetyhymy ramyhÿre-wana heka riwahinymyhÿre

iratyre sōwetyhymy tamy dealàna riwahinymhỹre. Kia heka Deuxu wowydyna-ò tuu ratximyhỹre. Bedewoõmy.

¹⁶Iny bedewonaõhyyre heka. Iny umyreny retybynyre. Txuõ txuõlemy heka ratỹmyranyke inywo-ki. Tiie heka aõbo rierynyre inatyhy wahe. ¹⁷Iny bededỹñanareny heka urihimyoðle roimyhỹre. Iny wowydynarenyko-ki heka aõhõkỹmy dỹñnana inyboho ritarenyke inydireny retehemyhỹre. Retyhenyrenyre wowydyna-ò awityhyremy inyboho idi retehemyhỹre iny idi retehõmyhỹredi. ¹⁸Aõbo iny tuu robimyhỹre bede bedemy tuu iny robimyhỹre ibutumy idi reamy. Aõbo iny tuu robiõmyhỹre heka tiu itueõtyhy. Kia-di tahe inyboho röhõtinyinmyhỹre.

5 ¹⁻²Inyummy tỹmyrahakỹ heka inydeereny kidiwahinykre Deuxu, iwitxira biu bede-ki wahe. Aõ häbu wahisidỹña-ki aõkõ Deuxu-di wahisidỹña-ki heka tuukre kia umy tỹmyra wahe. Tiu heka itueõtyhy. Rakabedeworenykre heka bede-ki iny telesõreny-ki rasỹnyreki inywo-ki wahe. ³Inyboho heka biubede-ki inysỹreny inyummytỹmyra-ki rököhõtinyinmyhỹrenyke. Kaa iny umyreny wahe. Rabadewomyhỹrenyre. Umy tỹmyraõ heka rikitarenykemy inyboho ratximyhỹreny. ⁴Aõherekibo inyboho wiji rabadeworenyre? Inyboho heka Deuxu bedewihikỹ-ò arõirenykekõ aõbo? Inyreny rikitarenykemy aõkõ wiji. Kaki aõhõkỹmy dỹñnana riwawobededỹñyra. Kia aõbo umy tỹmyra tyre tahe rikirutyrenyke ijõ wahe. Ijõ rikitarenykre umyuedeõnaõ. Tiu itueõtyhy. Kia riwinyre inydeereny kia wahe. ⁵Deuxu dori tuu rarybereri inydee riwahinykremy. Tatytybytyhy dori diwahinyde diteõsinyde. ⁶Kia iwese juhuhu rarybere wese heka tuu rotỹnykre. Tai heka inyboho teysamy ratximyhỹrenyre. Kabede-ki inyboho ratximyhỹre heka inyummyreny ratximyhỹre heka aõ Inynyrỹ-wana aõkõ ratximyhỹre. ⁷Tiu heka rokobirenyõtyhy rikityhynyrenykekile ka idi rakatxirenykre. Inyboho rieryreny timybo rarekre wahe. ⁸Jiarỹ wadee awire kabede-ribi arexitake Deuxu-wana arasỹnyke wahe. ⁹Aõma tamydeewimy heka tuu iny riwinyke wahe iny-wana rasỹnyke. Kaki iny ratximyhỹre tahe aõbo awire heka tamy awire. ¹⁰Inydireny retehemyhỹre. Aõbo inyboho riwinyhỹrenyre. Aõbina bina rikiwinyrenyke heka aõhõkỹmy dỹñnana inydeereny riwahinykre. Aõwihikỹ riki rikiwinyrenyke wana tasỹ. Aõbo awityhy inydereny kidiwahinykre.

¹¹Inynyrỹ heka inyboho rityhynymyhỹre. Tai inyboho iny witxira-ò tuu sōwemy relymyhỹrenyre. Ibutumy heka Deuxu iny rierymyhỹrenyre. Kaiboho heka tule tiwaerymahätenyte. ¹²Kia heka reraõmy watximyhỹrenyre biwaerybenyke. Ararybeõtyhy heka adeereny jiarỹ awiremy. Tahe wadee ka awire kaiboho waluurenyke. Häbu iumyle awimy rỹirerimy ihỹremy idi röhõtinyinmyhỹre. Tii heka õbiti aõkõ rare. Kia biwõnybenykemy adireny watxireri. ¹³Juhuu iny rieryremy itelesõ. Inyummyreny rarybekeki itxỹtemy inyboho roiremy. Rakaryberenyke heka aõbo inyboho dori Deuxu dee. Aõmysdỹñrenymyhỹreki inydireny röhõtinyinmyhỹre. Inyummyreny rarybekeki inyboho awilerenyremy. Iõrarureny-ki tuu rakatxirenyke. ¹⁴Kristu luuna heka kiamy iny riraykydỹñnymyhỹre. Tii heka rurure iny ibutudee. Tii rurureu, ibutumy inyderõwrenymy rurure. ¹⁵Rurure

heka aõma iny ixidee sohojile irumy rareke lau. Kia tako-ò rakreu tamy heka irumy rakre. Tamy dori rurure tai rexixare rubu-ribi. ¹⁶Rakaraykynyrenyke timybo hãbu awiré, ibinaré. Kaimy heka rakaraykynyrenyke. Aõ iwese iny witxira raraykynymyhÿre wese aõkõ raraykynyrenyke. Aõma inyboho aõbo Jesuisi Kristu-di raraykynymyhÿre heka. Ixityre aõbo tuukre. ¹⁷Tii heka umy tÿmyra tuedeõna-di ratximyhÿre iwitxira ratximyhÿre. Juhu iaõmydÿynana iribi ixãwira. Tahe wiji raraykywydynanyre iwitxiramy. Ibutumy iaõna aõna ihetxiu heka rawitxiranyre, awi-ò. ¹⁸Deuxu heka ibutumy kia riwinyre tamy. Inyboho heka ìludu roire, juhuu wahe. Wiji tahe iliinamy ijoi ratximyhÿre. Iny witxira heka iliinamy rarekemy idi watxiwãhãre. ¹⁹Wiji tahe timybo Kristu rarybekremy heka adeereny rarybereri. Aõma Deuxu kia liinamy rarekemy wahe. Ixinamy Deuxu. Ka Deuxu aõ anaumywitxiranydenyke. Kia Kristu òraru-ki tuu ratximyhÿre.

²⁰Jiarÿboho Deuxu deòdu roire. Tai Kristu deròwmy adeereny rarybereri: Iluuna ixidee ixby bimybenyke. Wii biwowixinybenyke. ²¹Deuxu heka iny òraruna ritidire Kristu tyre-ò. Kristu inyòrarunareny riwre. Wiji tahe Deuxu òbitina inydeereny riwahinymyhÿre.

6 ¹Jiarÿboho tahe raaõmysdÿÿnyrenyke Deuxu dee. Deuxu ruxetõna dori tetatenyete, tai idi mohõtinybenyke, õhõtirenry-ribi losaõmykemy. ²Boholabenyke aõmybo Deuxu rarybereriò. Jiarÿ heka aluurenryre iurenana tahe ka arybe-ò raholareri. Arawiõhenarenryre iu wadee textidenyete, wadee taryete. Boholake wiji heka bitabenyke Deuxu ruxetõna. Wiji heka biu-ò hena txumy bede rÿire. ³Inyõ iny aõmysdÿÿnarenymy ibinamy rarybekeki, uritere ijõ iny bedeworenymy, jiarÿboho òraru-ki. ⁴⁻⁵Jiarÿboho dori Deuxu deòdutyhy roire. Tai rikiteòsinyrenyke ibutumy aõbo inyboho dori Deuxu deòdu roire. Tai riteòsinyke ibutumy aõbo iny riwinymyhÿke. Aõna aõna rikiteòsinyrenyke. Òhòte wakirenry rÿimyhÿre. Ròtenawo-ò ralòmymyhÿrenryre. Bedeweweky-ki aõhõkÿmy ratÿÿnymyhÿre. Sõwemy heka reòludunryre aõnana bina binahakÿ reòludunryre. Aõ òta òta reòludunryre. Sõwemy heka raaõmysdÿÿnynihikÿrenryre. Sõwemy heka aõmysdÿÿnadikre; tÿikõ bede rejierenryre; byreõmy bede rejierenryre; ⁶òbitimy heka rewinyrenryre. Aõma, ywiny-di ròwidÿÿrenryre bedeeryna-di. Ka roirewãhã iny iwitxira rewiohenanryre. Ibutumy kia rewiohenanymy roirewãhã. Deuxu Tyytybytyhy heka wawanahy roiremyhÿ. Luuna heka inydee reteòsinyrenryre Inatyhyna rybe heka retÿÿnynmahãrenryre. Sõwe heka ritÿÿnynmy, jiarÿboho Deuxu deòdu roire wahe. ⁷Òbitina dori wadebõnarenry wese rare Satanasi itxemy. Jiarÿboho heka remymahãrenryre aritarenkemy. Tule iny rexijemyhÿre òbitina-di. ⁸Ijõ heka waluurenryre inyõ tasÿ aõbina binahakÿle wadee riwinymyhÿre. Ijõ heka Rybewihikÿmy wadee raryberemyhÿre. Ijõ tasÿ rybe binamy wamyre, raujõmo. Inatyhyna rarybemyhÿre. Tai wamy ruidu riwaninimyhÿrenryre. ⁹Ibutumy heka iny riwayreny. Tahe rieryõhyymy heka inatyhy rare. Watxiwãhãrenryre rubu wese ihãre tahe warumy watxiwãhãrenryre. Tiibohe heka rubu wesemy inydireny ratximyhÿrenryre. Aõhõkÿmy ratÿÿnyrenryre hãre raruõhyylemy watximyhÿrenryre. ¹⁰Aõna aõna heka

bedewonihikĩmy ròhònnyre. Tiiemy wadeysahyy watxiwãhãrennyre. Jiarĩboho heka urimynodule watxiwãhãrennyre. Ibutumy inyboho rityhydĩnyrennyre. Aõhomy aõkõ inyboho ratximyhyrenny tahe ibutumy inydire roimyhĩrennyre.

¹¹⁻¹² Tahe kaiboho ityhydĩydu seriõre mahãdu Oritxi hãwã-ki. Jiarĩboho heka kaa õbiti-my aõna aõnamy rarybemyhĩre. Kaiboho heka ijohona derarennyre aõmybo rarybemyhĩrennyre. Jiarĩboho heka aluurennyre. ¹³ Kai wariõre wesemy adee rarybereri. Umy iwese jiarĩ aluure wese, kai waluurennyre.

¹⁴ Boholabenyke warybereny-ò ityhydĩydu mahãdu-wana aõmysĩdĩnyõke. Timybo õbitinaõ heka aõbinaõ-wana raaõmysĩdĩnyõke. Timybo heka loosõna bedeluru-wana ratxike? Aõkõre! Tiu wiwana rauriõtyhy. ¹⁵ Satanasi heka Kristu-wana raaõmysĩdĩnyõnyõtyhy. Ityhydĩydu mahãdu wiwesehyyle raraykynykemy rĩira. Ityhydĩydu mahãdu-wana tahe wiraykyweseke aõkõre. ¹⁶ Deuxu aõmysĩdĩnyõna heka iwitxi rare, suritxoo aõmydĩnyõnana-ribi, wahe. Kaiboho heka Deuxu dohodĩnyõna ijoimy toite Deuxu oworeny-ki ratximyhĩre. Deuxule heka kawesemy rarybere: —Jiarĩ heka wasĩ ariwinykre ayrenny-ki. Jiarĩ iDeuxumy aronykre tiiboho waijoimy. Rorokurennykre. Tai tahe Inynyrĩ rarybere wiribi bihitxinyke. Inybina-ribi bexihitxinybenyke.

¹⁷ Bexiebenyke õbitikõre-ribi wahe. Uritere tamy adi rexihumy, ixieryta aramyrennykre ixidee wariõre wese.

¹⁸ Warurutyhymy adee rarybere. Boomy heka adireny arekre, jiarĩle wahe. Deuxu rurutere rare Jiarĩ.

7 ¹⁻² Deuxu ibutumy tuu rarybere: —Kai ityhydĩydu waseriõre mahãdu. Tai tahe rikexiõbitinyke ibutu aõmydĩnyõnana-ribi. Iny umyrenny-ki rokobirennyke inyumyrenny-ki. Õbitimy heka rakatxirennyke iko-ò, Deuxuko-ò. Aõma waluumy heka atximahãbenykeny rahõtinywãhãrennyre. Iny-ò aõ bina bina rewinyõhywãhãrennyre. ³ Tuhe kaa rarybere tahe ixityre anarybekre. Aluurennyre jiarĩboho ibutuhyye ratximyhĩre iny rummy ratximyhĩre hãre tasĩ rukururennykre tulekre. ⁴ Wadee heka awire ibutumy kaiboho ratximyhĩrennyre. Kai aõwitxira witxira wadeereny rĩira umy retyhynnyreki. Isirare heka wadee kia ratximyhĩhãrele Wadeysatyhymy heka watxiwãhãre, wiõhedĩnyõtyhy õraru-ki, ijyy õraru-ki.

⁵ Jiarĩboho rethemynnyre Macedonia bede. Taita tule elehynaõhyre wadereny. Ibutumy heka aõna aõna, õta õta witxira witxira; bede bede ihymy aõkõre rĩire tai. Aõma bedewonihikĩ heka watelesõrenny-ò ralore. ⁶⁻⁷ Deuxu riwawiohenanyrennyre; Txitu diteõnyde wadeereny. Tii rybereny heka awiremy kaiboho. Tai tahe reysarennyre jiarĩboho. Kaiboho tabedewomy atxitenyteri waõraru-ki. Katahe wadeysa nihikĩmy watxireri. ⁸ Adeereny warybetyriti rewahinyreki tabedewomy atxitenyete. Tai tahe reysamy watxireri. Ihãrele heka tyyriti adeereny arawahinykre. Kaiboho heka tabedewotenyyte iribi tahe aõmydĩnyõna kaiboho tewitxiranytenyyte teõbitinytenyyte ibutumy. ⁹ Tai tahe jiarĩ reysamy watxireri. Aõbinare dori rewinykõre arawiohenyrennyre heka.

10-11 Deuxu heka iny ribedeòtiidỹnnyhỹre iny ywimy riraykydỹnykemy. Kia kidiwymhỹke inydee tarasana wahe. Tii heka awire. Ijõ bededeòtiidỹ tahe bede ludu bede òtiidỹ. Kia tahe rubu diwymhỹde. Kaiboho heka tabedeòtiidỹnnyhỹtenyete. Deuxu heka kia riwinyre awiõhedỹnny aõma kaiboho awirenyre. Aõ wixira wixira sõwemy akireny rỹreri, aõ òta òtareny. Kiadile tahe aõma òbitihyimy òhò ayreny-ribi kaiboho heka taykarananytenyete. Kaiboho heka waluudumy teletenyete. Kaiboho biwinybenykemy aõbo òbitimy ratximhỹre iwidỹmy tarotenyete. Ibutumy heka òbitihyimy rarekemy idi tetehetenyete. ¹²Tai kia tyyriti adeereny rewahinyre. Aõ kia rewinyre heka aõ iny iõrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe. ¹³Tai heka wadeysamy watziwãhãre. Aõ inyboho sohojile aõkõre teysa ratximhỹrenyete. Txitu tule teysamy ihỹmỹhỹre, kaiboho tawidõhenanyteki ¹⁴Tu heka rarybere adeereny kaiboho dori awimy tai tahatenya awityhy. Adeereny heka inatyhyhy rarybemahãrenyete, inatyhynamy. Tule mobo rarybere Txitu-ò. Ka tahe inatyhy rarybemy ratximhỹre. ¹⁵Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyete. Ihãrele urihimỹò ruberumy ratximhỹ. ¹⁶Reerymahãre jiarỹ kaiboho òbitimy boibekre. Tai wadeysamy watzireri.

8 ¹Deuxu ruxetõena-ki heka sõwemy riwinyre Macedonia dohodỹna mahãduy-ki wahe. Jiarỹ tuu arelykemy idi watzireri waseriõreboho. ²Sõwemy heka iaõna aõnareny iaõtaõtarenyete tiiboho. Aõhõkỹmy rotỹnyneri tiiboho. Ihãrele ka deysamy heka relerenyete. Reysareny heka. Tiiboho heka iaõkõrenyete. Aõhohomy aõkõ heka roiremyhỹ. Kiahãrele heka sõwemy riwahinyre tamahãdu wiõhedỹmy. ³⁻⁵Riwahinyre heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiõhedỹmy rurumy roiremyhỹ. Tai inyboho ribedeòtiinyre sõwerekiki. Kia judea bede, dohodỹna mahãdu, kia wiõhedỹmy. Juhu heka tiiboho rexiwahinyrenyete Inynyrỹreny-ò. Tule Deuxu deewina inydee riwahinyre. Iny wiõhedỹnnyrenyete rexiwahinyre. ⁶Tai tahe jiarỹ rarybereri Txitu-ò: —Kai biwiõhenanykemy iaõmydỹnnyreny-ò. ⁷Kaiboho heka sõwemy tetyhynyteri. Kaiboho heka Deuxumy awimy tarybemyhỹtenyete. Kaiboho heka teerytenyete Deuxu aõmydỹnny. Kiaboho heka waluureny waluurenyemy boibeke wawiõhedỹdureny. Biwawiõhenanybenyke. Tai heka sõwemy bexiõlòdỹnybenyke adireny watzireri. ⁸Aõ bede ywinaõ heka adeereny rewahinyõhyreri. Arierykemy heka idi watzireri timybo aluuna ratximhỹremy. Tii riteõsiny heka timybo ijõ dowiõhedỹmyhỹdemy. Tai tahe iwese tii rotỹnyre wese kaiboho tule botỹnykre. ⁹Deuxu ruxetõena teerytenyete, Jesuisi Kristu ruxetõena wahe. Tii heka ityhy rare. Tii rikõdỹnyre heka aõrarurenny-ki. ¹⁰Taihyky tetyhynytenyete Deuxu aõmydỹnny-di. Kiamy heka raraykynyneri. Arawiõhenanykemy heka adireny rahõtinyre kanau bedeu. Tewiõhenanytenyete inatyhymy. Tai tahe biconananybenyke kia kanau bedeu tewinytenyete heka biconananybenyke. ¹¹Aõma ireiõno, uriõno biwahinybenykeki, Deuxu heka rimyke. Kia-di rõhõtinyke. ¹²Kia uriõnomy idi teywinymy atxiteri-di

ròhõtinyke. Tamy wahidỹỹmy aõkõhyykeki tahe Deuxu aõma raraykynyõtyhy. 13-14 Jiarỹ heka isiramy adee ariwinyõtyhy aõ. Kaiboho heka sõwemy kaa wiji toite, Tai tawowi-di inyõ ròõkeki, taaõnasõwe myna Deuxu-ò riwahinykre. Iaõkõkeki tai ibinamy Deuxu rahaõtyhy. Tai biwiõhenanybenyke heka ihoõmy rỹira mahãdu. Jiarỹ heka aõ retõenyneri aõkõ rare, biwahinybenykemy. Kai ihoõmy atxikeki tahe, tule inywitxira anawiõhenanykre. Taita wiwanale wiwesehyyle ròhõnykre. 15 Kiamy heka Tyyriti-ki Ritidỹỹna roire: —Hãbuõ heka sõwemy ributunyre. Tahe aõhe rauhenyõhyyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyyre.

16 Txitu awiõhedỹỹrenymy rurumyhỹre iwese awiõhedỹỹrenymy rurumyhãre wesele wahe. Deuxumy realãre tai, Deuxu dori tuu rotỹỹnyre. 17 Taita ixinamy arorarenymy rehemnykremy. 18 Riwiõhenanyrenyneri iwitxira seriõreõ. Ibutumy dohodỹỹna mahãdu-ribi tii rityhynymyhỹre aõma Rybewihikỹ-di ritỹnynymyhỹre awimy. 19 Dohodỹỹna mahãdu rihitxinyre wawana kanakemy. Ibutumy Inynyrỹ loosõna heka tuu ratximyhỹre. Tule riteõsinymyhỹre ibutumy iny rikiwiõhenanymyhỹrenykemy. Tai heka inyseriõrereny reteõnyrenyneri ityhydỹỹdu mahãdu. 20 Tai inyõ kia nierumy inyõ rarybeõtyhy. 21 Òbityhylemy rikiwinyrenyke ibuturu-ò. 22 Ijõ tii-wana rake. Reurihirenyre heka tii wiõhedỹỹmy rakeõ, tai heka tii wiõhedỹỹmy ratxireri. 23 Txitu heka waliina rare; wawana raaõmysdỹỹnymyhỹre heka rare. Jiarỹboho heka awiõhedỹỹrenymy rarumahãrenyre. Ijõ seriõrerenyõ nade dohodỹỹna-ò wiõhedỹỹmy. Tai kaiboho wowydyna tamy biwahinybenyke. 24 Tai tahe dohodỹỹna mahãdu kaki rierykre. Tai rityhynyrenykre aõmybo umyreny rarybere. Tule wiluumy atxiteri.

9 1 Reerywãhãre jiarỹ wiõhedỹỹmy tarumahãtenyete Judeia bedeki. Tahe kiamy aõ aõkõ ariritinykre. 2 Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: —Akaiã bedeki seriõre mahãdu wiõhedỹỹmy rexiwinyumy ratximahãrenyre kau beõrau. Tai tiiboho rexideysananyrenyre. 3 Tai heka kaa seriõre mahãdu reteõnyneri. Tai heka awikre biwiõhenanybenykre dori. Kiamy iwese rarybereri heka inatyhy rare. 4 Araixỹrukre heka jiarỹ aõma bexiywinybenyõlemy wiõhedỹỹna-ò atxibenykre-wana. Tule kaiboho maixỹrubenyke. 5 Tai heka inyseriõrereny reteõnyre akorenymy. Tahe iu arehemnykreu, bexiywinybenyke. Biwahinybenyke wiõhedỹỹmy atxitenyteri ixideewimy. Aõ jiarỹ adeereny rexitõenyneri aõkõ wiõhedỹỹmy.

6 Kia hãbu ibutemy ròbòròmhyhỹre heka ibutelemy tamy aõna aõna ruhunykre. Kia hãbu sõwemy ribrõnymyhỹre tahe tamy sỹ sõwemy aõna aõna ruhunymyhỹre tamy riwahinykre bederaty aõmydỹỹnana. 7 Tai heka iny sohoji sohoji ixideewimy tiwesebo riwahinymyhỹke. Riwahinyõke tahe aõ tuu rurukõreri urenana tuu ratxike. Deuxu dee riwahinymyhỹke mahãdu deysana-di riwahinymyhỹre kia iny mahãdu Deuxu tuure. 8 Deuxu heka riwahinymyhỹre sõwemy aõmybo tarumahãte kia inydeereny iratyre. Ibutumy aõmybo tarumahãte heka tule iny witxira biwiõhenanybenyke. 9 Kiamy

Ritidỹna-ki roire: —Tii tawowi-di iaõkõ mahãdu-ò. Ròwahimyhỹre. Kia tahe iinydee wobrona tiiemy rosaõmy rarekre. Deuxu heka riwahinymyhỹre tibo alòbòròdu-ò. ¹⁰Inydee riwahinymyhỹre paõ iny rirỹsỹke. Tahe tule sohoji sohoji òwòrutymy rurumyhỹre heka tamy riwahinymyhỹre. Kia ribòrònymyhỹre tahe Deuxule ritxuhudỹmyhỹre. Tahe sòwemy bitakre Deuxu-ribi. ¹¹Kia rimymyhỹre mahãdu tahe Deuxumy realãmehỹre. Kia tewinymahãte heka Deuxudeewimy tewiòhenanymahãte. Deuxu heka sòwemy rimymyhỹre ealànareny iòraru-ki. ¹²Kaiboho heka Deuxu mahãdu teriwiòhenanytenyte. Kia sohojile aõkõ. Tule aòraru-ki tiiboho Deuxu-ò wowydyna sòwemy riwahinyrenyke. ¹³Kaiboho Rybewihikỹ tỹmyra tetyhynytenyteri, Kia ibutumy rierymyhỹre kaiboho dori uriõno tewiòhenanytenyteki, tai iny wowydyna Deuxu-ò riwahinykre. ¹⁴Adee rexitòenykre aluumy heka relekre Deuxu adee ruxetòena riwahinyreki. ¹⁵Deuxu-ò wowydyna iny-ribi kanakemy heka idi watzireri. Wahidỹna wihikỹ dori Deuxu inydeereny riwawahinyre.

10 ¹Jiarỹ Paulo heka aõmybo adeereny arexitòenykre. Aõherekibo tamy tarabemahãtenyte awanareny watxiwãhãu urihimyòle watyhyna watzirerimymy wamy tarybemahãtenyte. Jiarỹ heka awana rybetere-di rarybeõmahãre awanareny watzireri wana. Tiu rareu, taheka ròritidỹre rybetere-di wahe. ²Ròhòtinymyhỹre. Rexitòenyreki. Awi heka rare. Ywina-di iny risỹnymyhỹre. Inyò wamyreny ibinamy rarybekeki tahe tule ararybeke heka. ³Inatyhymy kabede-ki inyboho rasỹnymyhỹreny. Rakaaõbinanykeki, inyumyreny aõbinana wesemy rare. Tebònadirenyre. ⁴Tebònadirenyre. Aõ kabedemy iny rỹira kia debòna wese aõkõ kỹny. Deuxu debòna heka rỹira irurule heka rare. ⁵Inyò aõbinamy Deuxumy rarybemyhỹkeki, tai tahe kia wadebònareny remymy resewãhãrenyre kia ixãwididỹnany wahe. Ibutumy Deuxu òludumy ratximyhỹre heka remywãhãrenyre Deuxu rierykemy Kristu rityhynkemy wahe. Kaiboho heka ibutumy tetyhynmahãtenyte. ⁶Kaiboho biatybenykeki, tahe, rexihuhymy rỹimyhỹre aõhòkỹmy dỹnana-ò. ⁷Kaiboho heka tetehemahãtenyte aõna aõna-ò ahana-ribi wesele wahe. Inyòraraykynykeki ratximyhỹreny ixinamy tuu raraykynyke. Jiarỹboho heka tule Kristu mahãdu hõrõ iny ratxirenyreki. ⁸⁻⁹Deuxu heka ruuò wadee diwahinyde arawiòhenanykemy tai raixruõmyhỹre. Tai heka abrebudỹrenymy aõbo kariti rewinyre. Urile tahe aumydỹreny adireny rewisỹnywãhãre aõ bede arãatyremy aõkõ. ¹⁰⁻¹¹Ityyriti rybetere heka ribrebudỹre tahe rehemynyre heka tii aõkõ rybetere-di rarybemyhỹre. Awityhymy aõkõ rarybemyhỹre riritinyre. Iwese ròritidỹre wesemy aõkõ rarybere. Iu adehemynykre tahe, iwese ròritidỹre wesele heka anarybekre. ¹²Iny tai ratximyhỹre heka sòwemy ixidi ròhòtinymyhỹre tii awiremy. Kia tahe watzimyhỹreny kia raryberenyòtyhy. Tii dori raitxỹtemy ratximyhỹ. ¹³Aõmy iximy rarybemyhỹre dori tii awimy iximy rarybemyhỹre heka urile tuu raraykynymyhỹ. Timybo Deuxu inydee raryberele rikiraõmyhỹke. Kiawesele inydeereny awire. ¹⁴Iaõmysỹdỹna heka timybo rikiwinyrenykele iny rijjemyhỹreny. Juhu heka Rybe tỹmyra wihikỹ heka adeereny adiwykemy idi watxiwãhãre.

Rewyrenyre heka juhuu Rybe t̄myra wihik̄y adeereny rewyre. Tai heka tuu raryberenyōhyymahārenyre timybo iny wixira aōmys̄d̄ȳna riwinymyh̄reny. ¹⁵Kaiboho heka aityhyd̄ȳnareny raumynykre. Tii heka wadeereny awire. Jiar̄yboho heka aōmys̄d̄ȳna wihik̄y s̄owemy ariwinyrenykeny watxirenryeri ayreny-ki, Deuxudeewireki. ¹⁶Idi tahe aròirenykre rybe-di arit̄ynynyrenykeny ijōbede-ò, Rybe t̄myra wihik̄y-di wahe. Aōmy ararybeōtyhy aōmys̄d̄ȳnareny iwixira rewinyreny. Kiamy heka Ritid̄ȳna-ki roire: ¹⁷—Urule tuu rybe r̄yike Inynyr̄ timybo riwinyrelemy. ¹⁸Iny ixidi r̄oh̄ōtinymyh̄re tii awireny. Tahe awi aōk̄ō rare Deuxu-ò. Deuxu tahe awimy tai rahamyh̄re tii idile r̄oh̄ōtinymyh̄reki.

11 ¹Jiar̄y òsana urihimyò raitx̄ytemahāremy kaiboho wawana t̄oiterimy ixi-di atxitenyteri. Ihārele taheka urihimyò reòludunymahāre. Jiar̄y heka okorenre iwese Deuxu ratximyh̄re wesele. ²Wimy atximahābeny adireny watxireri. Kaiboho iwese ijad̄oma hābumy roikre wese toite. Hābu heka Kristu rare. ³Jiar̄yboho raberuwāhārenyre kaiboho Kristu-wana atximahābenyke lau wahe. Iwese Eva hemylala riitxenanyre wese wahe. ⁴Inyō kanakeki r̄oh̄āletedȳmy Jesuisi wixiramy. Tahe kaiboho bityhnybenykekile jiar̄y heka raberumahāre. ⁵Ijō dori rit̄ynynymyh̄re iwese inyboho rit̄ynynymyh̄renyre wese aōk̄ō iwixiramy. ⁶Kaiboho heka tah̄ōtinymahātenyete t̄nydȳȳdu wihik̄ȳmy inkireny ratximyh̄re. Tahe awireny idi tah̄ōtinymahātenyete. Tai iwesele inyboho roire awi heka roire. ⁷Tahe iwese tii awityhymy rarybemyh̄re wesemy aōk̄ō inyboho rarybemyh̄renyre. Tahe iny rierymyh̄renyre inraykyreny-ki. S̄owemy heka tuu adeereny rarybemahārenyre. Iu jiar̄y rybe rit̄ynynymy akireny rarewāhāu, kiau heka adeereny rexit̄ōenyōhyre iōwydȳȳmy. Iyjamy heka ixidee reijenyrenyre kaiboho bexiòlōnybenykeny. Teòsare òsana iwese rewinyre wese. ⁸Ijō dohod̄ȳna mahāduò heka riwaòwynyre adeereny arit̄ynynyrenykeny. Iwese iribi rawasinyre wesemy heka rah̄ōtinyre. ⁹Iu akireny rybe-di t̄nydȳȳmy rarewāhāu tiu rexit̄ōenyōhyre adeereny biwawiòhenanykeny. Macedonia hāwā-ribi dori ityhyd̄ȳdu, mahādu seriòreō aōmybo raruwāhāre wadee diwyde. Tiu heka aō aribireny aritaōtyhy. Tuu rarehyy wese heka wiji rarekre. ¹⁰Kristu inatyhynamy wadee rarybereri kia wese tule ararybekre ibutumy Akaia hāwā hāwā-ki. ¹¹Jiar̄y heka aluunihik̄yrenyre. Taile heka tuu rarybewāhāre Deuxule rieryre. ¹²Kia rybe t̄nydȳȳdu heka iwese rewinywāhārenyre wesele r̄owid̄ȳmyh̄re. Kia heka rewinywāhārenyre heka kia rarybereri heka aō wiribi lahitxi aōk̄ōmy rarybereri. ¹³Kahābu heka inatyhy Deuxu deòd̄ȳna aōk̄ō ratximyh̄re. Ruile heka iaōmys̄d̄ȳna-ki r̄oh̄ōnymyh̄re. Rexit̄ynynykeny Kristu deòd̄ȳna mahādu-ò. ¹⁴Tahe aōk̄ōre heka Satanasi tule rexiwixiranymyh̄re. Ÿju wesemy tii rexideòsinymyh̄re. Kia hābu teòdu rare. Tai heka irehemy iribi rexijaranyre òbiti deòdu mahādu ratxireriki wahe. ¹⁵Urule tuu iny idi r̄oh̄ōtinykelemy heka tuu ratxirerimy ih̄yre. Tahe aōk̄ōre. Ikonanau tahe aōh̄ōk̄ȳmy d̄ȳnana ritarenykre aōbo riwinymyh̄re òraru-ki.

¹⁶Ixityre tuu ararybekre. Inyō raykyk̄ōmy jiar̄y itx̄yte raremy. Ararybekre heka waaōmyd̄ȳnanarenymy. ¹⁷Teramy ijirarenyōmyke aōmybo ararybekre. Deuxu

dori tuu arybedỹ-ò riwajjõnomy, tai heka rarybere itx̃yte wesele watximahãremy. ¹⁸Kaiboho heka taholamahãtenyete itx̃yte mahãdu-ò. Katahe bodoholabedenykre aõmybo ararybekre. ¹⁹Inyõ kedehemynykeki kaa biwinybenykre. Tahe tewinymahãtenyete aõna aõnomy aõkõ wahe. ²⁰Inyõ araitxenanyrenykeki uritere aõmyd̃ỹrenyõmy tamy. Jiar̃y heka ariwinyõtyhy tuu, wadee awiõre. ²¹Ijõ rarybemyh̃yre inyõ. Tule jiar̃y ararybekre. Itx̃yte wesemy ratximyh̃remy. ²²Tii heka Hebreu mahãdumy tii rexininire. Jiar̃y tule kia tuu rare. Ijað mahãdumy heka tiiboho rexininirenyre. Jiar̃y tule. Abraõ riokoremy rarybemyh̃yre. Jiar̃y tuleri. ²³Kristu deòdumy heka tii rexininimyh̃yre. Rarybemahãre itx̃yte wesemy. Jiar̃y heka iratyre deòduwimy watxiwãhãre. Jiar̃y raaõmysd̃ỹ nihik̃yre. Rõtenawo-ò riwarutyrenyre iratyre. Riwayatenyrenyre iratyre. Arurure inihe iratyre. ²⁴Judeu mahãdu heka 39 hetenamy wamy raðhõtere iruyre sõwemy wahe. ²⁵Roma mahãdu tas̃y inataõmy riwahatanyrene. Sohoji ta mana-di watyre rihure. Ijõtxu heka hãwoninihik̃y heka riorore. Aõutxu heka bera-ki rãire ruu ibutumy txuule ibutumy rehure. ²⁶Ibutumy reamy rarewãhã aõma wasidu bede aõmyd̃ỹnanamy bera-ki tule arurure inihe. Judeu mahãdu warubud̃ỹmy wadi riwis̃nyre. Tule judeukõdu mahãdu tuleri. Hãwãhãk̃y-ki rebunatyhymy watxiwãhã, bede rahi-ki tule, ahohok̃y-ki tule. Waliinaõ inatyhy aõkõ tai ih̃myh̃y. Tai heka riwaitxenanyrenyre. ²⁷Aõmysd̃ỹ nihik̃y tai. T̃yikõhyky heka bede rejemy rarewãhã. Rama riwasare; bemy rarowãhãre. Timy heka t̃yinatykyõ ihoõhykyre sõwemy wahe. ²⁸Tai tahe rahõtinyre ibutu dohod̃ỹna mahãdu-di. ²⁹Urihimyõle taruru-di ratxireri wana jiar̃y tule iheki waruruhohomy aõkõ relemahãre. ³⁰Inyõ raðrarunymyh̃yre wana jiar̃y rabadewowãhãre iõraru-ki. Jiar̃y rexideòsinywãhãre waaõkõre urityhywãhãre. ³¹Deuxu Jesuisi Kristu tyby dori riwaerymyh̃yre aõu aõu heka iny rakanihik̃nykre. ³²Iu Damasu hãwã-ki rarewãhãu, Iòlò Areta bede dinodu heka riwamymy riwateònyre. riwamykemy hãwãhãk̃yry ijõ-ò. ³³Weriri nihik̃ywoomy riwawòmomy riwatidire, Walina mahãdu. Tahe heto raroo-ribi riwaatyre hãwã ahana-ò. Tai tahe rahenyre iribi.

12 ¹Jiar̃y heka ararybekemy watxireri. Aõ aõkõ rarehãrele heka ararybekemy watxireri. Wiðhed̃ỹna aõkõ heka rare. Wanyr̃y wadee riwahinyre aõna aõnomy heka rabire rasina wese jiar̃y sohojile wahe. Kiamy heka arelyykre wiji. ²⁻³Tahe 14 beõramy heka Deuxu ityhyd̃ỹduõ ridyre biu-ò tas̃y-ò wahe. Deuxule rierymyh̃yre inatyhy aõbo rare ada aõkõre aõbo. ⁴Kahãbu Deuxu-ribi heka rybeõkemy roholare. Tahe rarybeõtyhy. ⁵Iximy tahe ararybeõkre kia wadeysarehãre. Waaõhõk̃ymy d̃ỹnanadile areysakre. ⁶Urile ararybekre timybo releremy. Taile tahe iny tuu rarybekre. Tuheka rabire sõwemy aõwiwihik̃ymy. Jiar̃y awiremy iny wamy raraykynyheny. ⁷Tahe Satanasi aõbinana witxirahak̃ybo wadee riwahinyre. Ixidi arõhõtinyõkre. Jiar̃y aõwiwihik̃y jiar̃y raremy wahe. Araraykynyõkemy. ⁸Inataõmy heka Inynyr̃y-ò rexitõenyre kiamy waribi ritakemy. ⁹Tii wadee rarybere: —Waruxetõenale heka adee awire. Aõbo kai taaõkõteu heka waruru adee rewahinyre. —Tai tahe jiar̃y reysare, waaõkõreu

wahe. ¹⁰ Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, warurudikre.

¹¹ Rarybere heka hãbu itxÿte wesele heka rarybereri. Kaiboho iòrarureny-ki heka kia wesemy rarybereri. Inatyhymy heka jiarÿ kia rybe tÿnydÿÿdu mahãdu bina ratyre watiwãhãre. Ayreny-ki rarewãhãu heka teerytenyete. ¹² Aõna aõna wiwihikÿ, deytenu wihikÿ, bededÿtidÿÿna ayreny-ki rewinyre kia Kristu deddumy watiwimihÿreki wahe. ¹³ Rybe tÿnydÿÿ òwyo heka aribireny retaõhyyre.

¹⁴ Ihewoludu txu tahe aroramy arakemy ixidi watiwixereri. Inataõmy reywinyra aroramy arakremy wahe. Aribi nieruõ aritaõtyhy. Urile arawidhenanyrenykremy adireny watiwixereri. Uladu riki heka tyby riyrubunyõtyhy. Tyby tahe uladu riyrubunymihÿre. ¹⁵ Ibutumy idi watiwixereri heka arahukre arawidhenanyrenykremy. Adeereny wylemy arihukre. Jiarÿ heka aluurenre. Kaiboho aõbo tule waluurenre?

¹⁶ Waòraru-ki heka adee isiraõkre heka. Ihãrele tahe inybina wamy rarybemyhÿre: —Tii itxenadÿÿdu rare. ¹⁷ Wamahãdu tule aribireny ritaõtyhy ijõ. ¹⁸ Txitu reteðnyraijõ ityhydÿÿdu seriðreõ-wana. Tii aõbo aõ aribireny ritare? Aõkõre. Txitu wawesele heka tii rare.

¹⁹ Taõmysÿdÿÿna heka awidhedÿÿnarenymy rare. Aõ wadi jiarÿ awiremy nohõtirenomy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awidhedÿÿrenymy. ²⁰ Raberumahãre heka arehemynykreu, iwitiwixiramy atxibenybeke lau. Tule wadi iwitiwixiramy betehibenyke ixiweserenymy aõkõ. Ihãru, adebure. Aõkemy watiwixereri. Iny aõbina binamy wimy rarybemyhÿre. Iny ixidile röhõtinererimy ihÿre mahãdu. Kia aroholakeki tahe wadee awiõre. Riyrubunymihÿre. Riyrubunyõhyymihÿre. ²¹ Raberuwãhãre heka arahinykre heka akotxireny idhãru òraru-ki. Aõna aõna witiwira witiwira òta òtamy röhõtiniymihÿre, raraykynymihÿre. Sõwemy heka riwinyre ta ixi-txi tõhõti reaõhyymihÿre kia riwinyretxi.

13 ¹ Tahe ikonana txu roraludu heka jiarÿ rare. Inyõ aõbina binamy wimy rarybemyhÿreki waribi ihitxihitximy heka tuu rarybemyhÿre. Iny rimymihÿre heka tuu robimihÿre; tuu rarybemyhÿre. Wiweselemy heka tuu rarybekre. ² Iny iòrarudimy rÿikre-wana, ibutumy heka aõhõkÿmy rotÿÿnykre arehemynykreu. ³ Aõmy Kristu rybemy heka rarybekre. Tai bierybenykre. Aõmy warurudÿÿdure heka bierybenykre Kristu wahe. ⁴ Kristu heka itxeð-ki rurure irururenyõ wahe. Jiarÿ warurunarenkõ òraru-ki. Tahe Deuxu ratximihÿre, iruruna-di. Tii-wana heka inyboho heka ratximihÿrenre iruruõmy. Tai awanarenyle watiwixereri, tahe tii-wana Deuxu ruruna-wana watiwixereri. ⁵ Ixi-di heka betehibenyke. Bexiurihibenyke tyhyna-di atxitenyterimy. Jesuisi Kristu awo-ki ratxireri. ⁶ Kia terytenytemy, inatyhy. Tahe jiarÿboho inatyhymy aõna aõna riijerenre. Kia aõbo teerytenyete. ⁷ Jiarÿboho rexitðenyrenyãhãrenre. Òraruna widÿÿrenyõmykemy. Kaiboho aõwiwi biwinybenyke. Kia òbitimy

watximyhÿrenyrenki aõkõ, kiemy òbitimy boibenykemy. ⁸Aõbo heka inatyhyna wiðhedÿÿnale rikiwinyrenyke. ⁹Kaiboho arurudimy atxitenyteri-wana heka, jiarÿboho warurudimy watxiwãhãrenyke, kia wadeereny awi rare. Rexitðenmahãrenyke kaiboho òbitimy matxibenybekemy, ywimy ahãbenykemy. ¹⁰Tai heka adeereny ratyyritinyreri kiamy. Aribireny irehemy watxiwãhãre taheka arawiðhenanyrenyke. Arehemynykreu tahe timy heka aõhõkÿmydÿÿnanamy arõhõtinyõtyhy, kia waaõmysÿdÿÿna rare. Inynyrÿ dori iny wiðhedÿÿnarenymy nade. Iny aõhõkÿmy dÿÿnanamy aõkõ.

¹¹Arakre tahe waseriðreboho. Idi biwisÿnybenyke ibutumy òbitimy biwinybenykemy. Warybe-ò heka boholabenyke. Wiwese weselemy maraykywydynanybenyke wiribihiximy aõkõ. Ywina-di matximahãbenyke. Deuxuluuna heka tule akireny ratxikre. ¹²Wii birybenymyhÿbenyke ityhydÿÿdu seriðre mahãduõ tai wiluumy atximahãbenyke. ¹³Ibutumy Deuxu ijoi mahãdu heka adee rybe riwehityhynanyreri. ¹⁴Jesuisi Kristu Inynyrÿ ruxetðena heka akirenykemy watxireri. Deuxu luuna aki rÿikre. Deuxu Tyytybytyhy awana rÿikre.